

Žestoki napadi u Siriji pred glasanje u UN-u

15 februar 2012 Izmijenjeno 12:43 CET

Naftovod u Homsu i naselja u Hami bombardirani, dok diplomati zahtijevaju rezoluciju Generalne skupštine UN-a o Siriji



Sirijske snage sigurnosti već 11. dan granatiraju Homs [AFP/Getty]

Sirijske snage sigurnosti bombardirale su u srijedu naftovod u Homsu, te izvele ofanzivu na Hamu, izvijestili su aktivisti. Vijesti o novim aktivnostima sirijskih snaga tokom jedanaestodnevnih napada dolaze u vrijeme kada je francuski ministar vanjskih poslova Alain Juppe izjavio da su počeli pregovori o novoj rezoluciji Vijeća sigurnosti Ujedinjenih naroda o Siriji s Rusijom, te da želi razmotriti uspostavu "humanitarnih koridora" u Siriji. "Dva vojna zrakoplova bombardirala su naftovod u Homsu, smješten na periferiji četvrti Baba Amr", izjavio je Hadi Abdulah, član Vijeća revolucije u Homsu. Istakao je da je ovo treći put da je naftovod napadnut, ali da je prethodno na njega pucano topništvom. Nije bilo moguće potvrditi te zračne napade iz nezavisnog izvora.

Treći napad

Opće povjerenstvo sirijske revolucije, jedna od opozicionih skupina, također je potvrdila u saopćenju da je naftovod bombardiran po treći put. Vlasti su, međutim, za napad na naftovod optužile "terorističke sabotere". U Hami, tenkovi okupljeni oko citadele u tom gradu napadali su četiri naselja, dok trupe ulaze u grad s aerodroma, izvijestili su izvori iz opozicije. Aktivisti tvrde da nema izvještaja o žrtvama iz Hame, četvrtom najvećem sirijskom gradu, zbog problema u komunikaciji. Juppe je za francuski radio France Info kazao da „ponovno pregovaramo o rezoluciji Vijeća sigurnosti UN-a kako bi uvjerali Ruse". Prema njegovim riječima, Generalna skupština UN-a glasat će o "simboličnoj" rezoluciji u četvrtak što bi trebalo pojačati pritisak na vladu u Damasku.

Manja težina rezolucije

Rezolucija, koju su predložili Katar i Saudijska Arabija, „potpuno podržava“ plan Arapske lige objavljen u januaru kojim se omogućava „sirijska politička tranzicija ka demokratskom, pluralnom političkom sistemu“. Prijedlog rezolucije „poziva sirijsku vladu da odmah zaustavi sva kršenja ljudskih prava i napade protiv civila“, te „osuđuje svako nasilje, bez obzira odakle ono dolazilo“. Ali u prijedlogu rezolucije ne spominje se zahtjev Arapske lige za zajedničku mirovnu misiju sa UN-om, koji je dočekan sa oprezom u nekim zapadnim

prijestolnicama. Prijedlog rezolucije Generalne skupštine je sličan rezoluciji koju su blokirale Rusija i Kina u Vijeću sigurnosti četvrtog februara.

Dok se na rezolucije Generalne skupštine, koja broji 193 zemlje članice, ne može uložiti veto, one također imaju manju težinu od rezolucija Vijeća sigurnosti. Generalna skupština UN-a prošlog novembra je donijela rezoluciju kojom se osuđuje represija naroda u Siriji, ali se nasilje u toj zemlji nastavilo.

Sirijska državna novinska agencija izvijestila je u Srijedu da je predsjednik Bashar al-Assad odredio 26. februar kao datum za nacionalni referendum o novom prijedlogu ustava ove zemlje. Iz ustava će biti izbrisana stavka u kojoj piše da je vladajuća Baath partija „lider nacije i društva“. Ustavni amandmani bili su ključni zahtjev opozicionih grupa na početku ustanka protiv Assada u Martu, ali ove grupe sada traže njegov odlazak s vlasti.

Izvori: Al Jazeera